

Madanm Speaker, mon pran laparol bonmaten pou 20enm fwa pou reponn en mesaz prezidan lo leta nou nasyon. Monn reponn mesaz Prezidan Rene, Prezidan Michel, Prezidan Faure, Prezidan Ramkalawan e la Prezidan Herminie. Sa 20 repons in donn mwan loportinite fer en parkour politik a-traver listwar nou pei, dan lopozisyon kot nou ti 3 manm selman ler mon ti rantre ; dan koabitasyon ; konman Lider Zafer Gouvernman avek en mazorite absolli ; e la konman Lider Lopozisyon dan Lasanble. Sa enn repons i diferan avek lezot. I diferan akòz I pe ganny fer dan lannen zibile lor nou lendepandans, e I pe ganny fer apre ki nou parti LDS in pas 5-an o-pouvwar. Sa I donn mwan loportinite pou reponn mesaz Prezidan Herminie dan konteks sa de lanniverser : enn nasyonal, lot personnel.

Ler Seselwa ti desann lo Stad Poliler le 28 Zen aswar pou seremoni lendepandans nou pei, nou pep ti diviz an de morso egal politikman. Lanmwatye ti siport Parti Demokratik ; lot lanmwatye ti siport SPUP, granper Parti US. Me, nou dirizan ti demann nou met nou diferans dekote e ini konman en sel pep anba en sel paviyon ver en sel desten. Nou ti fer li ziska ki 11 mwan pli

tar granper ti deside ki se li ki devret pran pouvwar. Linite ti nepli enportan. Lafors e dominasyon ki ti pran plas.

La, 50-an pli tar, nou pep in ankor divize : lanmwatye i siport parti US; lot lanmwatye I siport LDS. E, ankor enn fwa, Prezidan I fer en lapel pou linite. 50-an in pase. Sitiasyon politik dan pei i ankor parey, menm refren pe ganny sante. Eski lavenir nou pei e nou pep pou diferan safwasi, ouswa eski nou pou antre ankor dan en peryod dominasyon en parti politik dan tou sektè nou lavi parey ti arive an 1977 ? Eski Sesel in aprann okenn keksoz dan sa dernyen 50-an ouswa eski menm politik pe ganny aplike lo menm playbook? Eski nou politik in evolye dan sa 50-an ouswa eski parti o-pouvwar i oule dominann nou lavi dan tou kous lasosyete parey noun konmans war deza? Andot mo, eski soley pe lev parey i ti fer le 29 Zen 1976 avek lespwar en pep an-antye, ouswa eski i pe lev parey I ti fer le 5 Zen 1977 avek vizyon dominasyon en sel pwen-d-vi politik, en sel azanda, en sel loptik pou nou pei?

Mon fer sa refleksyon byen boner, Madanm Speaker, akòz se sa mon preokipasyon, e preokipasyon bokou dimoun ankor, pa zis dan lopozisyon, me osi parmi bokou kin siport US dan dernyen

eleksyon e kin observe sa kin arrive dan sa detrwa dernyen semenn.

Aprè sa premye 100 zour ladministrasyon US mon regard otour mwan e mon pa war en pep avek lespwar pou en meyer lavi. O-kontrer, mon war en pep dan lafreyer, dan dout, dan konfizyon. Dan son diskour inogirasyon, Prezidan Herminie ti fer en lapel pou linite, en lapel ki in repete plizyer fwa depi sa. Me par son aksyon pandan sa bann semenn kin pase nou pann war okenn demonstrasyon linite sorti kot Prezidan. O-kontrer, nou war li pe atak son predeseser, lider lanmwatye nou pep, toulezour, retir tou vestiz sa ki ladministrasyon LDS in fer, met dout dan lespri Seselwa lo byenfe sa dernyen 5-an.

Sa se pa aksyon en dirizan ki anvi inifye son pep dan lannen selebrasyon 50-an lendepandans. Se aksyon en dirizan ki anvi rule border litousel e diviz nou pei e nou pep. Prezidan Herminie pe koz linite anmezir ki i senm divan divizyon e in swazi pou fer sa dan lannen kot lepep Seselwa in donn li loportinite pou prezid lo lannen zibile lor Lendepandans nou pei e servi sa lokazyon pou Koste Seselwa e fer ki ansanm nou kapab – la ki nou demokrasi in matir e kot in annan de tranzisyon e pasasyon pouvwar dan lape

ant sa de lafors politik dan nou pei – ansanm nou kapab met lepase deryer nou e regard lorizon avek kouraz, determinasyon, lafyerte, ini konman en sel nasyon, anba en sel paviyon e anba proteksyon nou papa ki dan lesyel.

I tris alor pou konstate, Madanm Speaker, ki Prezidan Herminie in swazir pou pa mars dan semen linite, me pou refize rekonnet valer dimoun ki pa siport son parti me ki annan en kontribisyon pou fer, pou ranplas dimoun konpetan par son siporter, pou met lwayote par devan kapasite partou dan gouvènmman, pou fer kler ki si ou son siporter ou pou byen pase ; me si ou pa, ou kapasite travay pa enportan, ou pou ganny met akote. I enposib pou konstri – ouswa mentenir – en nasyon kot sakenn pe bos son kote, kot en kote i zis atake ; kot lot i defann son lekor.

Bann kin ekri konstitisyon – e sa i enkli Prezidan Herminie – in met sa provizyon pou konmans sak lannen travay Lasanble Nasyonal avek en mesaz Prezidan lo leta nou nasyon. Ki ti rezon deryer sa provizyon ? En mesaz Prezidan lo leta nou nasyon se en lodit ki Prezidan in fer dan son kapasite konman sef deta Sesel, pa konman dirizan United Seychelles, pa konman sef brans lekzekitiv, pa konman sa dimoun ansarz ladministrasyon, me

konman sef deta, konman Prezidan tou Seselwa, enkli nou lo sa kote latab, enkli sa 30 mil kin siport nou dan dernmyen eleksyon, enkli Wavel Ramkalawan.

Se en lokazyon pou sef deta pas an revy bann lakonplisman pei dan sa dernyen lannen, pou met leta finansyel pei devan son pep, pou donn enpe statistik – rate deviz etranzer, rezerv gouvènmman dan Labank Santral, konbyen lakaz kin ganny konstri, konbyen touris kin vin Sesel, konbyen larzan pei in fer etc. I osi en lokazyon pou sef deta tras en pe direksyon pei pou lannen ki pe vini, pou met devan son pep serten devlopman kle ki son gouvènmman pou fer – kote lanbasad Sesel pou ouver, kote pou fermen, ki plan pou amenn pliz deviz, ki bann gro proze kapital ki pei pou al antreprann etc, dan en fason ki tou Seselwa a konnen ki leta nou nasyon i été e ansanm kontribye pou amelyor sa ki nou annan.

Olye fer sa, Prezidan in fer en diskour politik parey i ti pou fer ler i adres en rali son siporter. In prefere pas an revy son promes 100 zour e demann son siporter pou Trust the Process e esper zot bat lanmen. Me pli konsènan, in konsantre lo atak son predesèser e pozisyonn son lekor konman en zofisye lapolis ki pe vin fer lanket

lo sa kin pase. Olye regard devan e donn lespwar son pep, in prefere regard deryer e kritik sa kin arrive. Plito konsantre zefor lo fer avanse pei, in met zefor esey detri lopozisyon. Apre ki diskour in fini, Seselwa pa pli enformen lo konbyen larzan ki dan nou rezerv, lo konbyen touris ki nou ekspekte gannye sa lannen, lo ki demars pe pran pou gard valer rounpi stab, lo ki gran proze devlopman pou annan dan pei, lo konbyen lenvestiser etranze pe vin investi dan nou pei. Par kont, nou konnen ekzakteman konbyen komisyon lanket pe al gann etabli pou fouy dan travay ladministrasyon Ramkalawan, nou konnen ki Prezidan in santi li nesese pou anploy 14 minis e sepa kombyen sekreter deta, ki Ahmed Afif konman Vis Prezidan pa ti devret pran sarz en minister, me ki Sebastien Pillay konman Vis Prezidan I kapab pran wit. Tousala nou konnen.

Ler sa I arrive, Madanm Speaker, leta nou nasyon pa bon. E sa, Madanm Speaker, i fer mwan dir ki leta nou nasyon i kritik. **The process cannot be trusted.**

Leta nou nasyon, Madanm Speaker, se ki nou annan en gouvènmman ki anvi efas tou sa ki ladministrasyon LDS in fer.

Nou war sa toulezour dan tou desizyon ki gouvèrnman i pran, sa ki tipti konman sa ki gran. Lotel lo Assomption, me osi desen lo sa de moniman lo roundabout anvil. Ouvèr State House pou piblik. 13enm mwan baze lo performans. Laz pansyon sekirite sosyal. Polisi lo seve etidyan. Se konmsi gouvèrnman US i anvi efas latras sa dernyen 5-an e fer krwar ki sa pann arive. Zot a seye, Madanm Speaker, me lagrenn ki LDS in semen, lagrenn responsabilite endividyel, travay dir, sorti lo welfare, pou zermen e pou grandi. Napa pwazon, napa Roundup ki pou touy sa ki pou pouse. Parey Prezidan Ramkalawan in dir, zot a sanz detwa keksoz me zot pa pou efas listwar e larealite. Ero Terminal Baie Ste Anne pou reste, Lopital St Mary's La Digue pa pou retourn kot Lopital Logan ti été, National Library, Batiman Carnegie, Stad Linite e Warehouse STC pou la pou lepep regarde toulezour e dir ek zot lekor, Man, be sa Ramkalawan pa in travay pou sa pei ? Seye efase si zot anvi. Ler zot lagonm in fini bit ek dibwa kreyon, nou pou la, Ramkalawan pou la e sa bann striktir pou la, akòz nou, nou pa zanmen les tombe.

Pou en nasyon grandi e reste stab, tou dimoun i bezwen dakor lo trwa keksoz : Kontiniyte, Stabilité e Linite.

Gouvernman pou sanze e lepep Seselwa in montre nou ki zot konpran sa. Tou le 5-an zot annan en sans tir sa ki la e ranplas li. Zot in fer sa de fwa konsekitiv deza. Parey nou sanson i dir, Sa ki Anler i Kapab Desann. Sa ki Anba i Kapab Monte. Me lepep i ekziz en keksoz, ki sa sanzman pa vin en lekskiz pou kraz tou sa ki sa enn avan in fer e rekonmans lo zero. Non, sa ki lepep i oule se ki sa enn ki vini i kontinnyen travay sa enn ki ti la, e bâtir lo fondasyon ki ekziste.

Gouvernman se pa en zwe Snakes and Ladders. Retourn an aryer I pa en opsyon. Bouz devan, fer pli byen ki sa enn avan e amenn ou pep dan plis prospérité ki konte. Kontiniyte e non pa kase refer ; evolisyon e non pa revolisyon, se sa lakle.

Stabilite i enperatif. Se selman avek kontiniasyon ki nou pou annan stabilité. En siporter LDS i bezwen kapab fyer ler i pas devan National Library, ouswa ler i antre dan Lopital St Mary's e dir ek son lekor, sa se travay nou gouvernman. E en siporter US i bezwen li osi kapab dir ler i war sa de striktir pe ganny amelyore par son gouvernman, wi, mon gouvernman in amelyor sa ki ti la avan.

Dan sa ki in fer ziska prezan malerezman, Prezidan Herminie pann pran an-kont sa trwa enperatif. Ou plito, in rezet sa trwa nesesite. I pous travayer ki siport LDS dan plizyer lorganizasyon e ranplas zot avek son siporter fidel. Olye rod rekonsiliasyon avek son predeseser I pe rod tou lipou pou met lo Wavel Ramkalawan – aras son sekirite zot zarm, pran son loto avek li, fer lamket dan tou gran desizyon ki in pran konman Prezidan. Rezilta tousala pou senmp, Madanm Speaker. Prezidan Herminie pe senm divizyon. I pe repous siporter LDS. E ler i pou pran levanter, se zis son dimoun ki pou otour li, larestan pou pe asize kot zot, pe follow the process.

Leta nou nasyon i kritik, Madanm Speaker. The process cannot be trusted.

Leta nou nasyon, Madanm Speaker, se ki nou annan en gouvènmman ki pa konsilte avan i fer en keksoz ki pou afekte en seksyon popilasyon. Dan son diskour linogirasyon, Prezidan Herminie ti promet pou konsilte avek lepep avan i pran en desizyon. Nou realize prezan ki sa ti en parol bonmarse san okenn lentansyon pou met li an-aplikasyon.

Dan sa premye 100 zour sa ladministrasyon Prezidan Herminie in fer sorti en lord ki dezorme gard trafik pa pou al lo scene aksidan ki pa serye. Sa ti pa ni en promes eleksyon, ni en desizyon pran apre konsiltasyon avek piblik ouswa menm bann lakonpanny lasirans. Mon ti dir kler ler sa desizyon ti ganny anonse ki i pa ti pou reste lontan. Mon parol sete : Good idea. But it won't work. En semenn pli tar desizyon ti ganny ranverse.

Aprisa, nou ti war lapwentman nouvo sef Servis Lentelizans Sesel par Prezidan san konsilte avek Komite Defans Lasanble Nasyonal parey lalwa I demande. Sa enn desizyon osi, Prezidan in bezwen kensel e refer an-akor avek lalwa.

La minister ledikasyon in pran de desizyon, ki osi pa ti dan promes 100 zour : ki gouvernman ti pou aret sa laranzman kot etidyan Praslin e La Digue ti pou kapab fer zot A Levels dan lekol Vijay Inyernational Baie Ste Anne, e ki sa manda seve ki tin ganny etabli par ladministrasyon LDS swivan en mosyon ki Lasanble Lazenés ti amennen e pase pe kensel.

Toulezour nou tann sa gouvernman pe koz lo lazenes, program par isi, program par laba pou lazenes. Be ler en desizyon ki konsern lazenes, e ki paran e etidyan ti war konman en bon keksoz

pou ganny sanze, zot pa konsilte sa lazenes. Se sa zot vizyon pou lazenes ? Si wi, dir nou a aret kasyet deryer baravan konsiltasyon ki pa zanmen arive.

Tousala i montre nou en ladministrasyon, Madanm Speaker, ki napa okenn lentansyon konsilte. Parti US in toultan en parti dominer, e parti ki krwar ki zis li ki konnen, ki koz zoli parol epi fer tou le kontrè.

Leta nou nasyon i kritik, Madanm Speaker. The process cannot be trusted.

Leta nou nasyon, Madanm Speaker, se ki nou annan en gouvènmman ki enterfer avek travay lezot brans gouvènmman e ki pa respekte lespas ki konstitisyon in mete ant sa trwa brans.

Mon fek dir ki Prezidan pann konsilte Komite Defans Lasanble avan i ti apwent en nouvo dirizan pou Servis Lentelizans pei. Sa ti enn. Me i pann aret la.

Le 31 Desanm in fer li ankò. I fer sorti en S.I. kot in apwent en Board of Inquiry ki ti pe al fer lanket dan en kes ki pe ganny zize devan lakour avek lentansyon ed bann akize avek zot defans. In

menm servi langaz mersener pou dekri serten dimuon kin fouy lakaz sa lakize. Sa ti en lenterferans direk avek en kes ki pe ganny zize par Sef Ziz e in annan rezilta ki kes in bezwen sispann pou les sa lanket fini son travay, e ki Sef Ziz in bezwen met gardfou pou fer ki rezilta sa lenvestigasyon pa enterfer avek sa kes ki li i pe zize.

Pa fini la. Prezidan Herminie limenm, i mont lo televizyon pou dir ki in pardonn de prizonnyen aköz li, Prezidan, ki pa ni en avoka ni en ziz, in trouve ki en lenzistis grav in ganny konment kont sa de lakize. Les akote ki lapolis in war levidans kont sa de dimoun, ki Atorni Zeneral in satisfè ki ti annan en kes pou pourswiv, ki ziz in kondann sa de dimoun lo levidans kin sorti ankour, e ki lakour dapel pann war okenn merit dan zot rapel. Met tousala dekote. Dokter Patrick Herminie li in konstate ki en lenzistis in ganny konment alor sa de dimoun ti merit ganny en pardon. Be dan sa ka, Madanm Speaker, annou frenm lafòrs lapolis, annou frenm biro atorni zeneral e lakour. Les State House decide lekel ki koupab e lekel ki inosan. Dan sa fason pei ava sov en kantite larzan ki nou pou kapab fer lakaz, lekòl, klinik etc ouswa fer desann laz pansyon pou ariv 50 an.

Me pa fini la, Madanm Speaker. Prezidan Herminie ti promet en lenvestigasyon lo lotel Assumption. Byen. In apwent en konmisyon lanket dan sa zafer. Byen. In oule al visit sa zil pou war sa ki pe arive laba pou limenm. Byen. Devan lakour konstitisyonnèl Friends of Aldabra in met Gouvernman ankour pou fer aret sa proze. Savedir ki Friends of Aldabra pe met presyon lo sa proze. Me ki nou war ler Prezidan Herminie i mont lo zil? I amenn sa menm Friends of Aldabra avek li e I abir dan enn zot triko. Savedir, I pe anvoy en mesaz avek e lakour konstitisyonnèl e komisyonnèl Twomey-Woods ki li i pe pran kote Friends of Aldabra. Sa se pa lot ki en lenterferans direk kont lakour e konmisyon lanket.

Me pa fini la, Madanm Speaker. Prezidan Herminie li menm in anonse dan son diskour SONA semenn pase ki son gouvernman pe anvizaze annan reform dan sistenm lazistis kriminel dan pei. I kler sa ki i anvi. I demann Seselwa pou trust the process, me limenm li I pa trust the process e les lapolis, biro Atorni Zeneral e lakour decide lekel kin kas lalwa. I le ki li I annan kontrol lo sa prosesis. Son bann aksyon dan sa direksyon dan sa premye 100 zour i montre nou klèman ki lapant i anvi pran.

Leta nou nasyon i kritik, Madanm Speaker. The process cannot be trusted.

Leta nou nasyon, Madanm Speaker, se ki nou annan en gouvènmman ki sakrifye lekselans pou lavites, ki sakrifye konpetans pou lwayote.

Sa ki noun war depi eleksyon se en gouvènmman ki pe tay dan tou direksyon. Lo en kote Prezidan Herminie in pran en bann letan pou li met en gouvènmman an-plas. Se konmsi zot pa ti pe ekspekte ranport eleksyon epi zot in tay partou pou rod dimoun pou vin minis, enkli pov Madanm Bernstein ki li son telefonn in sonnen ler i ti lo vakans apre ki non lezot son bann koleg tin fini ganny soumet avek Lasanble.

Me lo lot kote, noun war en ladmistrasyon in a hurry. An-vites pou akompli zot promes 100-zour, me osi an-vites mon fer krwar ki zot pe travay. E dan sa travay vit, zot fer fot. Monn mansyonn sa fame direktiv pou gard trafik pa al lo scene en aksidan, ki ti senpleman en manev pou esey demontre avek lepep ki sa gouvènmman pe travay. In fel.

Vis-Prezidan li in vin devan Lasanble Nasyonal avek en seri lalwa pou retourn 13enm mwan, pou sanz lalwa hate speech e deklarasyon byen e retourn zot kot nou ti été o-paravan. Sa i normal. Diferan gouvènmman i annan diferan polisi. Me, dan zot lavites, zot in mank loportinite pou fer ki lalwa ti pou kapab pli bon ankò, si zis zot tin pran en pti letan pou perfeksyonn li. Par ekzanmp, zot ti poun kapab trouv en mekanizm pou asire ki – dan zafer 13enm mwan – napa disatisfaksyon ant travayer ki prodwi e sa ki trenn liye. Zot pann trouv en solisyon a sa problem réél avek lefe ki bokou dimoun ki zot ti krwar zot ti pe al fer kontan i pa kontan akòz zot zefor ekstra pa ganny valorize.

Dan ka deklarasyon byen par bann minis, ziz e politisyen, zot in bliye, parey mon tin fer zot rapel an Avril 2025, pou fer ki tou partner ler en zofisye pann marye i osi deklar zot byen akòz sansan sa lalwa i diskriminatwar kont dimoun ki marye. Epi zot ti annan en sans pou fer ki deklarasyon byen i pa fer dan lanvlop, me ki sa i vin piblik. Dan zot lavites ouswa dan zot fer krwar zot pe travay ler tou sa ki zot pe fer se cut and paste, zot pann fer. Se pou sa rezon ki mon ti dir, e mon repete, ki dan sanmenm sa tern Lasanble mon pou amenn en lalwa pou koriz sa mankman e pou

fer ki tou politisyen, depi Prezidan andesandan, i bezwen deklar nou byen, e sa ki pou nou spouse ouswa partner, e ki sa deklarasyon i vin piblik pou ki tou dimoun a konnen sa ki zot dirizan i possède. Lo nou kote latab nou pa per nou, Madanm Speaker. Nou fer nou deklarasyon nou. Sezot lot kote ki annan labitid pa fer sa ki pou zot.

Fer keksoz vit noun war lekonsekans – revwar sa deklarasyon gard trafik lo aksidan, revwar lapwentman Direkter Servis Lentelizans, fer ki Sef Ziz in bezwen pran lo limenm pou met en limit avek sa bord lanket dan lenportasyon zarm. Zot ti appel nou gouvernman en gouvernman kanmaron. Ozordi, lekel ki pe fer aryer toulezour ?

Leta nou nasyon i kritik, Madanm Speaker. The process cannot be trusted.

Leta nou nasyon, Madanm Speaker, se ki nou annan en gouvernman ki pe retourn nou pei dan en welfare state.

Noun war sa depi zot promes elezsyon kot en seri promes larzan ti ganny fer: 13enm mwan san kondisyon; kart STC; URS; long

service; retourn laz pansyon sekirite 63-an ; fer monte pansyon retret pou ariv 10,000 rounpi ; triple lock. Tousala sete bann handouts. Okenn reform striktirel panny ganny planifye. Zis nwa donn zot.

Nou ti dir ki sa bann promes pou kout pei tro bokou. E nou ti annan rezon. La ki bidze 2026 in sorti nou war ki bidze **an-gro in redwir, me ki alokasyon pou Lazans Proteksyon Sosyal in ogmante par 50%, pou sorti zis parlao 1 bilyon rounpi pou ariv 1.6 bilyon rounpi**. Anpliskisa, la zot pe al fer desann pri bis. E konmsi sa pa ti ase, konpansasyon TRNUC osi pe al ganny met lo ledon taxpayers – R20 milyon an 2026, sepa konbyen ankor sa bann lannen ki pe vini. Mon fer en parantez la pou dir ki sa zot pou pey zot menm. Pa kont lo nou pou fer pase sa bout bidze, ni lo okenn Seselwa pou pey pou zot atosite. Zot ava servi larzan Maison du Peuple e sa ta milyon ki zot in gannnen dan lavant later pou pey pou zot fot. Pa kont lo Seselwa pou ed zot.

Konmsi sa pa ti ase, larzan pou bezwen al rode pou pey saler sa 14 minis ek zot ekstravagans vwayaz (dapre konpran la 7 minis lo 14 pe al vwayaze avek Prezidan sa semenn), loto nef e menm make-up State House, larzan pou bezwen al rode pou sibvansyon

SPTC akòz sa rediksyon dan pri bis kin anonse, e larzan pou bezwen al trouve pou pey konpansasyon viktim TRNUC. Tousala pou mor lo ledò travayer Seselwa.

Am-mezir ki sa bann depans pe akimile, Prezidan Herminie pann donn en sou detay lo ki mannyer son gouvènmàn i antisipe grandi lekonòmi pou pey sa bann lekstravagans. En mo pann ganny dir lo okenn proze kapital par envestiser etranze. En mo pann ganny dir lo si pou annan okenn logmantasyon lo taks, si pou annan plis touris, si negosisasyon lo lakor lapès avèk Linyon Ewopeen pou amenn plis larzan dan kof leta. En mo pann ganny dir lo kote seving pou ganny fer, kote bidze pou ganny koupe pou asir tou sa depans kin ganny promet.

Sa dènyen eleksyon in montre nou diferans ant vizyon lon-term pou en pep e benefis kour term pou detrwa : pou sa ki annan 63-an, pou sa kin kondannen pou drog, pou sa ki pe esper ganny zize. For the few, not the many. US in zwe lo febles dimoun ; dimoun in reponn avèk zot vot. E la prezan, se sa bann menm dimuon kin vot pou US, e tou sa ki pann vot pou zot – sakenn parmi zot lo lot kote latab, e sakenn parmi nou lo sa kote, a traver nou larzan taks

– ki pe al peye pou sa bann benenfis ki US in promote saler sa pake sekreter deta ki in apwente.

La kot LDS ti ofer nou popiliasyon lendepondans personnel e responsabilite endividyal, US pe retoun nou dan en sistenm depandans lo leta, lo sa parti ki o-pouvwar. Regard sa zafer seve bann etidyan. Olye les sak paran ek sak zanfan pran son responsabilite pou grooming, la nou gouvènmman pe dikte sa ki zanfan devret fer. La nou pe retoun dan sistenm parti inik – fer sa ki mon dir ou fer. Pa kestyonn mwan.

Pa fini la, Madanm Speaker. La Prezidan in anonse ki pres R60 milyon pe al ganny write off lo loan ki dimoun in pran avek Labank Devlopman. En sòlajman pou sa kin vremen bite e nepli kapab peye I byen. Me R60 milyon ? Ki manner ki ou pou eksplik avek sa pti dimoun ki li in transpire, in ser sang, in travay pou pey son loan avek bokou difikilte, ki la aprezan son vwazen ki li i pann annan sa sans responsabilite pou li pey sa ki pou li ki i pe al ganny write off, i pe al ganny en free pass ? Sa se menm fenomenn ki sa zafer 13enm mwan pou tou dimoun, sa ki travay e sa ki trenn lipye. E lekel, si pa nou bann taxpayers, lo sa kote latab, me lo zot kote latab ki pe al peye pou sa lepokase ?

Safety net I nesaser e I devret en lasistans toudilon en vwayaz ant nesans e lanmor en endividi ler i tombe. I pa devret vin en destinasyon, parey US in fer i. Akoz sa pa ankouraz devlopman en imen e en pep. I dekouraz linovasyon i dekouraz travay dir, i dekouraz responsabilite endividyel.

Problemm, malerezman i al pli lwen. Non selman nou pann ganny okenn detay lo foreign direct investment, akoz I kler pou napa, me Prezidan in anonse ki finansman in fini gannye pou en lopital, en vilaz reabilitasyon e en lekol vokasyonnel. I pann dir lekel ki pe al finans sa trwa proze me nou kapab konpran ki Lenn, Lasinn e kekfw Larisi pou parmi pei ki pou donn larzan pou sa bann proze. Kestyon se, ki noun promet sa bann pei an-retour pou zot larzan ? Sa Prezidan Herminie in reste trankil lo la.

Sa se playbook SPUP/SPPF. Donn dimoun larzan, fer zot kontan epi fer zot krwar ki zot in ganny met o-sant devlopman. Epi pran larzan avek pei zanmi pou bann gro proze. Se en politik ki marse. I gard zot o-pouvwar. Me antretan lekonomi i frazilize, valer rounpi i desann, pei I vin pli pov e pli depandan lo lezot pei. Nou rezilyans konman en nasyon lib e endepandan I ganny frazilize. Noun war sa film deza e son dezyenm parti kin konmanse an

Oktober 2025 pa pou diferan. Zot in fer tou pou ariv o-pouvwar, epi zot pou fer tou pou reste o-pouvwar. Welfare e dependans se zot baton mazik.

Leta nou nasyon i kritik, Madanm Speaker. The process cannot be trusted.

Leta nou nasyon, Madanm Speaker, se ki ozordi i tris viv dan nou pei.

Ler en gouvènmman i ariv o-pouvwar epi i fer en rali laviktwar e ranpli zis en kar laplenn Gordon Square, ou konnen i dan problem. Ou konnen ki dimoun in konmans regret zot vot. I tris pou dir, me se la kot nou pei i trouv li ozordi. E en gran parti i annan pou fer akòz nou annan en Prezidan ki koz parol linite me ki annan en leker vanzans.

Toulezour nou tann zis lanket dan sa kin pase. La dan diskour SONA Prezidan in anons ankor 5, pou azout avek sa de kin konmanse e sa enn pou CCCL ki li in stal. Pou annan lanket dan **swadizan unit Ibou**, dan riot prizon (malgré ki Konmisyón Drwa Imen i deza pe fer en lanket dan sa zafer), dan Travizory, e en odit

dan warehouse STC. Tousala i annan en sel bi – rod en fason pou denigre Prezidan Ramkalawan e redwir sikse remarkab e eksepsyonnel ladministrasyon LDS. Prezidan Herminie i konnen ki son ladministrasyon pa pou kapab akompli en kar sa ki LDS in akompli. Alor, olye donn son kouraz pou fer sa ki i kapab, i prefere esey redwir e detri sa ki son predesesor in fer e met sa an-dout. Napa okenn lot rezon pou fer tousala.

Par kont, lenvestigasyon ki devret ganny fer pann ganny anonse. Seselwa ti pou byen kontan konnen ki sa agreement ki Minis Barry Faure ti sinnyen avek Gouvernman Lenn pou en baz militer Assomption. E dan lakonpannyen 2020 ki tin sipoze fini an 2020 me ki 6-an pli tar pankor ni ariv lanmwatye e ki pli gro parti zil in fini donn avek konsiltan sa proze kot i pe fer en lotel. Seselwa ti pou byen kontan annan en lanket dan aköz Prezidan Herminie i krwar ki en lenzistis in ganny komet dan sa kes bonm dan stasyon Seypec Grand’Anse Mahe. Lala detrwa lanket ki ti pou enteres Seselwa. O-kontrer, olye lanket, sa ki responsab in vin Minis ouswa ganny large dan prizon.

Leta nou nasyon i kritik, Madanm Speaker. The process cannot be trusted.

Politik, Madanm Speaker, I pa en zero sum game. En gouvernman pa zanmen la pou touzour. E nou pei i reste en ki diviz an-de morso plizoumwen egal. Alor, sakenn sa de lafors politik i bezwen konsyan ki sipor i bouze e laviktwar i efemer. Ozordi I mwan; demen I ou. Ozordi ou ki la ; demen mwan ki pou pran ou plas. Ni mazorite absolli pa absolli parey eleksyon 2015 e 2025 in demontre.

Annou dir en keksoz kler: An term sipor, Gouvernman US pe asiz lo en razwar e anpandan avek en difil. Pa zanmen bliye ki kantmenm zot in ariv o-pouvwar, zot in ariv la avek siporter lezot parti ki zot in bezwen demann prete. Dan sa Lasanble zot annan en mazorite nimerik, me zot pann kapab ganny ni 50% vot. Savedir i annan plis dimoun kin vot pou lezot kandida ki sa ki ti vot pou zot mon bann zanmi lo kote latab gouvernman. Si pa ti kandida endepandan Au Cap e Mont Buxton, sa Lasanble ti pou reflekte nou pei aköz i ti pou divize 17-17. Prezidan Herminie li in ganny elekte dan dezyenm round avek mwens vot ki Wavel Ramkalawan ti gannyen dan premye round an 2020. Sa se laverite.

Larealite se ki kantmenm US I annan plis vot ki LDS, LDS I annan plis siporter ki US. Sa bann vot ki zot in gannye pa tou ki pou zot. Wi, zot annan zot core support. Me zot nariv o-pouvwar avek lasistans dimoun ki pa zot siporter, ki ti pa kontan Wavel, ki ti pe rod faver, ki ti pe rod zot gannye. Par kont, sak vot ki LDS in gannye i en vot senser, en vot avek leker, en vot ki konte.

Mon dir tousala pa pou denigre zot. Zot in ranport eleksyon. Sa I kler. Zot ki o-pouvwar. Nou dan lopozisyon. Non, mon dir sa pou mwan fer nou tou rapel ki politik i dynamik. Sa ki anler i kapab desann. Mon dir sa bann parol pou mwan retourn lo tenm linite ki devret karakteriz nou nasyon dan san lannen zibile.

Nou pei i beni, Madanm Speaker. Nou annan en kantite keksoz pou nou fyer konman en nasyon. E enn sa bann keksoz se lakonplisman ladministrasyon LDS dan sa dernyer 5-an. Lalis i long e letan pa permet mwan pas a-traver tou sa kin ganny fer, depi Covid, reouvertir airport, grandi nou lekonomi, ogmant rezerv dan Labank Santral, repar lenfrastruktir, konstri semen, por e fasilite peser en pe partou, batir lozman.

La kot Prezidan Herminie pe rod etabli konmisyon lanket, Prezidan Ramkalawan ti pe konstri e amenn lenvestisman etranze

konman lokal dan pei. Zis lotel kin ouver, repare ou rekonstri nou war Canopy, Laila, Cheval Blanc, Ile Platte, Assomption, Melia, Reef, Fisherman's Cove, La Reserve. Menm Les Mamelles noun ganny Day Care ki pe al ouver byento, trotwar, bus shelter, e la lakaz e mid range condo. Anefe, ler nou regard sa bann proze ki US pe koz lola ozordi, enkli konblaz, tousala se bann proze LDS ki prezan zot pe reklanmen e pe esper pou koup riban.

Me, anplis ki sa, LDS in montre Seselwa ki tou dimuon I annan en valer e en plas. I annan ki dir ki se lide Sesel Pou Tou Son Zanafan ki rezon ki LDS in perdi eleksyon, ki nou tin devret met nou dimoun an-premye parey US pe fer ozordi. Sa petet i vre, me en pei pa en yo-yo ki balans en kote pou 5-an epi balans en lot kote pou 5-an. En pei i bezwen kontiniyte, stabilité e linite. Dan sa sironstans, Wavel Ramkalawan in en lider eksepsyonnel e Sesel Pou Tou Son Zanafan ti en nesesite ki son ler pou retourn ankor.

Wavel Ramkalawan ti en once in a generation leader. Par lafors son personalite e vizyon ki i ti annan pou en Sesel normal, rules-based, avek respe pou tou sitwayen I ti amenn en lalit ki ti pran son parti avek 1500 vot dan premye eleksyon an 1993 e – a-traver

en seri lalit pou retourn demokrasi miltiparti Sesel, sanz paviyon e lim nasyonal, sanz non semen, retir 5 zen e zonm lib, lager ankour, sakrifye 5-an politik lo lasen nasyonal pou fer reform elektoral nesaser, a-traver kas latet par gard bate, a traver kaso pou son siporter, a traver ganny son non tire lo lalis voter pou li pa kapab stand an 2020, a-traver tousala, Wavel Ramkalawan in arive ranport en viktwar remarkab avek en mazorote absoli an 2020.

Personn pa perfe, e fot in ganny fer, me repons en senmp kestyon i evidan. Eski LDS in kit Sesel dan en pli bon leta ki in zwenn li an 2020 ? Demande zot menm.

Zis regard lafeksyon ki son siporter i annan pou li – regard sa laplenn Gordon Square avan eleksyon e konpar li avek laplenn rali laviktwar US apre eleksyon. Regard dernyen vizit piblik State House. Regard lafoul kin rasanble pou dir li o-revwar ler i ti kit State House.

La mon oule adres en parol direk avek Prezidan dan mon kapasite konman Lider Lopozisyon dan Lasanble: Prezidan Herminie, You won. Savour the moment. Get devan. Aret rod Wavel Ramkalawan. In 5enm Prezidan Sesel li. In fini antre dan liv

listwar. Son portre I lo miray State House e I pou obor sa ki pou ou forever. Get used to it. Ou annan en lanmen. Olye servi li pou donn lord partou kote pou denigre e kraz Prezidan Ramkalawan, ofer ou lanmen konman en Prezidan anver en lot, donn li respe ki son lofis Ansyen Prezidan i merite. Elev li e sa a elev ou osi dan lizye ou pep. Dan sa lannen zibile lor nou lendepandans montre ki ou osi ou kapab pran ou plas konman en dirizan pou tou Seselwa, spesyalman bann ki pann siport ou ou ki ou pa kontan. Ler ou arive fer sa, la nou ava kapab deside si nou pou trust the process.

An atandan, Madanm Speaker, parey Prezidan Herminie in fer permet mwan konklir mon repons par retourn lo tenm 50-an nou Lendepandans konman en nasyon.

Eleksyon in fini. Lavi in retourn an-ord. Plis ki zanmen, Sesel I bezwen tou son zanafan. Politik partizan pou kontinnyen diviz nou pei an-de parey in leka depi 1964. Nou bezwen viv avek sa larealite. Yer, nou ki ti ansarz. Ozordi, zot ki rule border. Demen nou pa konnen lekel ki pou la. Me, Sesel pou reste Sesel e nou nou pou stil Seselwa avan ki nou US ouswa LDS.

Nou pei i bezwen en sosyete pliralistik ki marse, en lespas piblik ki lib e ouver, en lekonomi ki amenn prospérité pou tou dan en fason kot larises i ganny partaze plizoumwèn egalman, en demokrasi ki protez sa ki pli feb e garanti respe pou drwa sitwayen, e en ladministrasyon ki get lwen e ki prepar pou l'avenir.

Sa lannen zibile ki nou ladan i donn nou en loportinite rar e eksepsyonnel pou zwenn ansanm e selebre nou linite dan diversité parey nou moto Lasanble i demann nou, e pou koste Seselwa parey nou Lim Nasyonal i ekzize.

Parey monn demann Prezidan Herminie fer anver Prezidan Ramkalawan, les mwan demann nou dan Lasanble etann nou lanmen across the aisle e demann sak Seselwa pou met politik de kote e donn lanmen kanmarad pou ki ansanm, konman en sel nasyon, nou ava fer **Sesel Pli For e Pli Zoli**.